

COLUMNNA

Cuschinar cun chindels

CHATRINA JOSTY-KREUZER

Insatgi da nossa scola a Moosseedorf ha gì l'idea gloriosa d'offrir il rom facultativ «cuschinar» per ils uffants da la segunda e terza classa. Primara. E jau curaschusa sun stada pronta da surpender las lecziuns ch'han lieu la mesemna mezdi. La mesemna suentermmezdi hai jau gea liber, ha, ha, ha!

Damai, ditg e mess vi ils spaghetti. Ma jau hai fatg il quint senza l'ustier: Spaghetti n'è betg il menu ideal. Mintgin dals nov pitschnins sto avair da far insatge, uschiglio regna il caos. Quel regna soviso. S'imaginai, ils uffants bernais van in onn pli baud a scola. Mes cuschinunzs curts han damai mo set ed otg onns!

Lura faschain nus halt fajitas. Dus taglian peperoni, dus spaletschan las gurcas, dus fan ina sosa cun avocado ed ina cun quarc e las pli grondas (quellas che vegnan cun il chau sur la platta da cuschinar) pon brassar il pulaster.

Enfin che nus mangiain, èsi quasi l'ina. E la lecziun finescha en ina mes'ura. Vul dir: Spert, spert, mangiar e lura lavar giu ruckzuck – uschè bain sco ch'i va.



In na va betg uschè bain. Entant che las bravas mattas lavan giu e mettan a lieu la vaschella, sponda in buob il sirup e dus auters curran suenter in l'auter per dar schleppas cun il sdratsch.

Jau dun trais taifels – tge che gida mo tschintg minutas. Pruvain cun tschigulatta – quai gida adina. Ma ils uffants èn in pau dischilus. Il rom ha num uffizialmain «ADS – Angebot der Schule Kochen/Backen». Els han interpretà quai sco «cuschinar E far turtas». Els lessan uss far turtas. Ma il temp è gia passà. Faschain halt la proxima giada... «Ina turta da carottas?» – «Ina Schwarzwälder?» e «Pizza!».

Jau propon muffins e schuppa da bustabs (ha, il past il pli pedagogic ch'i dat). Ma Mohamed recloma: «Ou na, schuppa da

bustabs n'hai jau betg gugent!»

Qua hai jau natiralmain ditg la frasa che tuts din ad uffants che na vulan betg mangiar quai che vegn sin maisa: «Cler, mes chars, lura faschain nus halt chikken nuggets.» – Dream on!

Nossa scola stuess esser in pau pli transparenta e dar in auter num al rom facultativ. Numnadain: «ADHS – Kinder kochen». U forsa «ADHS Kinderkochen».

Dal rest: ADHS na fiss gnanc uschè dasperas. Minimum dus da mes cuschinunzs han uffizialmain questa diagnosa. In auter è quasi in scheni matematic – però precis il cuntrari en situaziuns socialas. Ma betg mo ils buobs: Ina matta va da terapia a terapia per curar sias agressiuns e duas autras pon para gia consumar da tuttas sorts medias, uschè ch'ellas raquintan mo da Tiktok e Squid Game.

E tge che jau vulev'anc «dir», di Lara (senza diagnosa) cur ch'ella turna en cuschina suenter che jau hai tramess a chasa tuts. Jau pens – oha, tge vegn uss pomai? Ma ella leva mo dir: «Jau hai in chaval.»

Chatrina Josty-Kreuzer viva e dat scola en il chantun Berna.